

第一輯

中國
稀見
史料



中國稀見史料

第一輯

王春瑜 編

廈門大學出版社

图书在版编目(CIP)数据

中国稀见史料. 第1辑·第二册/王春瑜编. —厦门:
厦门大学出版社, 2007. 9
ISBN 978-7-5615-2748-1

I. 中… II. 王… III. ①古籍-汇编-中国②中国史-史料-明清民国时代 IV. Z422

中国版本图书馆 CIP 数据核字(2007)第 119514 号

厦门大学出版社出版发行

(地址:厦门大学 邮编:361005)

<http://www.xmupress.com>

xmup@public.xm.fj.cn

厦门昕嘉莹印刷有限公司印刷

(地址:厦门市前埔东路 555 号 邮编:361009)

2007 年 9 月第 1 版 2007 年 9 月第 1 次印刷

开本:889×1194 1/32 印张:16 插页:2

定价:(全四十一册)30 000.00 元

本书如有印装质量问题请直接寄承印厂调换

題南京工部屯田司署郎中事主事勞紹科違限疏
爲給由事考功清吏司案呈奉本部送准南京
吏部咨送南京工部屯田清吏司署郎中事主
事勞紹科歷任三年考滿給由到部送司查得
本部見行事例一南京考滿官員以給文日爲
始水程之外扣違限肆箇月之上叅問雖有事
故亦不准理查得署郎中事主事勞紹科係嘉
靖貳拾年玖月初捌日領出南京吏部公文延
至貳拾壹年柒月初捌日方纔到部除水程之
外扣違例限玖個月零貳拾日於例有違難便

引

奏案呈到部參照本官既違前例應合查究欲送

刑部問罪完日引

奏復職緣係京官未敢擅便謹題請

旨

嘉靖貳拾壹年柒月拾壹日具題拾叁日奉

聖旨是

覆南京工部虞衡司主事周仕致仕疏

爲乞

恩休致以全殘喘事考功清吏司案呈奉本部送吏科抄出
南京工部虞衡清吏司主事周仕秦臣原籍江西吉安府廬陵縣民由舉人於嘉靖拾壹年肆月間除授浙江嘉興府平湖縣知縣拾貳年捌月間丁母憂服闋至拾伍年拾月間補任應天府句容縣知縣兩任六年考滿皆膺繁劇染成痰大病症十分危急十九年六月間考滿除授本職臣自揣凡庸濫叨

恩寵惶愧無地不期舊病時發實難供職伏望

皇上念臣衰老朽乞

勅吏部將臣放歸田里以全殘生不勝感戴

天恩之至等因奏奉

聖旨吏部知道欽此欽遵抄出送司查得本部見行事例

凡自願告退官員不分年歲俱准致仕今該前因案

呈到部看得南京工部虞衡清吏司主事周仕泰

稱患病拾分危急乞要致仕一節查有前例相應

准理合候

命下行令本官回籍致仕員缺另行銓補緣係乞

恩休致以全殘喘及奉

聖旨吏部知道事理未敢擅便

嘉靖貳拾壹年柒月拾柒日具題拾玖日奉

聖旨是

覆貴州銅仁府知府桂伯諒致仕疏

爲痼疾不能供職懇乞

天恩休致事考功清吏司案呈奉本部送吏科抄出
貴州等處承宣布政使司銅仁府知府桂伯諒
奏臣原籍浙江寧波府慈谿縣人由舉人歷任
知縣主事員外郎即中今陞前職領憑已於嘉
靖貳拾年拾壹月貳拾日到任臣本草茅賤士
發身不由黃甲遭際

聖明荷蒙錄用深切補報何恤捐軀但年力老衰衆
病交侵日滋月益難以居官素患痔疾年久多

方賢治弗痊自浙江趨至銅仁柒千餘里觸冒
山瘴兼以不服水土舊疾又復攻作舉動艱難
殊失體貌臣欲就辭印恐孤任使罔敢輕舉正
值撫處苗夷饋給糧餉只得力疾供事延至于
今又因冷煖欠調勞瘁失節偏身疼痛左右足
底麻木站立不定臣稟受素弱又加前疾且兼
胃虛飲食日減精力愈衰難以仍前勉強移關
本府通呈撫按批行布政司議得臣到任未久
懇乞告休情出迫切方議行令調理又該分守
道查報病勢之重得於親見之真若復強留供

職不惟久而廢事抑恐難於生還呈允行府任

任調理聽候具

題明文至日施行臣遵依聽候日久柰何病體尅
羸日甚面色枯槁全無神氣若不早求退休必
然命殞夷地伏望

皇上俯憫微臣孤身懸寄邊徼惟此重大痼疾乞

勅吏部早放休致歸還鄉里俾臣得便醫藥調治庶
或苟延殘喘棲遲衡門之下仰觀太平之治如
其壽命止此亦遂首丘之願臣生死幸甚等因

奏奉

聖旨吏部知道欽此欽遵抄出送司查得本部見行
事例凡自願告退官員不分年歲俱准致治令
該前因案呈到部看得貴州銅仁府知府桂伯
諒奏稱有疾乞要致仕一節查有前例相應准
理合候

命下行令本官回籍致仕員缺另行銓補緣係痼疾
不能供職懇乞

天恩休致及奉

聖旨吏部知道事理未敢擅便謹題請

旨

嘉靖貳拾壹年采月貳拾壹日具題貳拾叁日奉

聖旨是

覆巡撫應天都御史夏 劾知州陳時熙疏

爲自劾不職有疾願告致仕事考功清吏司案呈奉本部
送吏科抄出總理糧儲兼巡撫應天等府地方都察院右
副都御史今陞南京戶部右侍郎夏 仰謨題據直隸廣德
州申准本州知州陳時熙開稱照得本職一介書生叨承大部
捫心有愧揣分何堪夙夜矢心圖惟補報不意到任以來水土
不服舊疾復作加以濕火瀉泄動即昏暈雖時加調理但
風氣相侵自難支持以致廢者未興新者未舉瘵曠之罪
真不可逃近因地方亢旱祈禱雨澤朝夕奔馳內中風氣
外承暑毒事已之後病乃大作偶爾暈去人事不知

止有一妻一女見之驚惶日不能食夜不能寐自念上蒙作
養下屬觀望功名之際誰不動心亦嘗思起自勵無奈病
日益深思日益固鄉土之念堅不可破意慮所及動
傷肺肝前疾愈加沉重螻蟻之軀亦何足惜誠恐州事
浩繁日就廢弛上負所托下失所望深為未便已經移閱
本州去後合行再閱煩為体念矜恤早為申達容令致仕
所有印信暫關本州申請明示署掌庶不誤事准此案
查先准本官關為患病事自到任以來水土不服時
加調理強自支持近因亢旱禱雨忽爾昏暈前疾愈
加不堪任事合行移關本州候稍痊任事准此申請間

今准前因緣係患病致仕事理未敢擅便擬合就行申請
為此州司除將原閱印信暫牒本州判官熊侯署掌
外今將前項緣由合行具申照詳明示遵奉施行
等因據此看得廣德州附近南圻分為直隸體統雖
似稍崇而職制實為迥異除授正官多係新任與知府之
歷試中外者不同同知判官多係監生力薄才疎非有推
官專理刑名之責間有降謫補授者不久遷去凡一切重大
刑獄之人理問以故本州并建平一縣勢豪巨族蔑視官
府驕縱自如孕毒懷姦靡所顧忌民間一切詞訟輒乃
攬撫細故鼓駕危詞掇往粧虛條成敏帙囁類招朋分

張排告推獻姦謀不可破事未及結而被誣者已破家亡身矣一或訊知主名潛令收捕則又動稱激激變從臾惑上司官司懼此招尤禁不敢問文案停滯習為當然其有精力敏銳憤其頑癩思欲一為整頓拔其根株奈入仕年淺智不周身術未及施先被姦民百端媒孽一經

奏告則罷黜解任莫不歡呼相慶自為得計以此釀成完悖莫能禁戢良善受害單弱難存所謂武斷鄉曲力折守宰雖古三輔潁川之豪猾不足過也必得老成練達才知有餘者授為守令發擿有術安輯有方庶可救其萬一今照知州陳時熙性本迂疎才難展布查取急用